

摘藻堂四庫全書薈要

集部

欽定四庫全書薈要

集部

武夷新集卷十七

八



詳校官助教臣常循

欽定四庫全書薈要卷一萬四千一百七十二

集部

武夷新集卷十七

宋 楊億 撰

表狀六 二十五首

代僕射李相公承天節進經疏狀

右臣伏以河清九曲爰屬於體辰節紀千秋式遵於故事富壽之祝臣子攸同況臣本乏器能出於幸會望苑早叅於賓護台司旋預於弼諧享厚祿之萬鍾奉禁庭之三接在具瞻之地無補於衮章荷洪覆之恩免傾於

鼎餗徒懷隕越莫報生成幸逢載誕之祥願益無疆之
算竊以大雄之教實為衆善之因輒就紺園式陳香供
命五夫之開士誦三藏之玄言六時之梵唄精嚴八部
之龍神護衛奉焚修於西竺用集勝緣仰峻極於南山
克資介祉拂石永延於浩劫傾葵庶竭於下誠云云

代人次對奏狀

右臣次當轉對理合上言輒有見聞不敢緘默臣竊以
太祖皇帝建隆年中曾降明詔聿修隆典咸秩無文以

前王之功及生民遺廟之存於地志蕪廢者新其營構
頽侈者俾之繕完乃至封樹以增崇固亦樵蘇而申禁
使吉蠲之薦肅奉於常儀昭格之靈允懷於主德暨五
嶽四瀆視三公諸侯興雲雨以利人奠坤元而載物並
增嚴於棟宇用祇事於神祇當時樹立豐碑以紀成績
赴告青史式煥大猷歷今古以遐觀真帝王之能事也
臣前知河陽領祠濟瀆舊制長吏每月朔薦獻必示躬
親尋以為煩祇令春秋享奠祭不欲數雅合禮經神實

依人式資崇奉臣竊見朝廷所修廟宇初葺斯久寒暑
載離或梁木摧頽或屋瓦滲漏漸成墮壞有爽精虔州
郡雖欲舉行動須申報俟符牒之往復必歲月之推遷
臣欲乞特降勅旨應前代帝王及嶽瀆祠廟自今後本
處長吏二時奉祠即令檢校或有踈損便許葺修仍破
省錢不須申覆如此則國之大事在祀典以惟寅神享
克誠亦陰騭之昭報干犯旒宸云云

代司空相公謝撫問狀

右臣昨日晚李沆等到臣私第奉傳聖旨以臣所患令
安心將治中書無事者處弼諧之任曾乏於謀猷垂攝
養之方自生於疾疚蓬蓽適居於假告冕旒仍示於記
憐特令當國之臣曲諭如綸之旨慰安彌極跼蹐靡遑
蓋念臣本出諸生素無遠略幸以遭逢景運際會先朝
但持孤直之心獲玷具瞻之地跛鼃安能於致遠短絆
非可以汲深袞章莫効於彌縫鼎實每虞於傾覆爰從
策免復預疇咨雖竭肺肝曷裨塵露終荷保全之惠繆

升師長之崇皇帝陛下恭已奉先虛懷求舊式汙揆路
再冠台司比三入於承明殊非光寵享萬錢於黃閣尤
負覲慙宵衣豈減於憂勤尸祿唯甘於嘲誚果貽瞰室
遂致卧漳瞻八彩之眉暫違堯陛賜十全之藥便降秦
醫命星使以宣傳若天顏之咫尺荷照臨之所及誠隕
越以難勝敢謂特遣輔臣同過陋巷備形問訊益示溫
存教以安心俾達農皇之養命諭之無事蓋慮孔明之
傷神竊佩訓詞仰銜睿眷頓祛沈痼丹九轉以何功誓

報生成身一毛而為喻感恩之至泄涕無從云云

代侍講邢侍郎陳乞狀

右臣伏有懇誠貯於肝膈蓋屬禋燔之慶方覃渙汗之恩冒昧上陳怔忡自失竊念臣有亡兄某早承義訓少習文儒肄業膠庠服勤簡素頗有詞藻見推輩流俯鄰壯室之年未及命鄉之薦忽嬰疾疹遽至淪亡臣亡妻某氏是臣二親在堂為臣聘娶親執箕帚逮事舅姑躬調滑甘奉養晨夕而臣未升朝籍臣妻已拚泉塗靡及

湯沐之封徒切糟糠之感今者郊丘布澤幽顯懷仁臣
不勝同氣之親痛深終鮮勉思齊體之義情極悼亡罔
避鈇鉞之誅輒干旒冕之聽伏望皇帝陛下俯矜懇悃
特霽寵章俾臣兄沾贈典之徽光生吉第而臣妻蒙追
封之命恩洽漏泉儻玄造之曲成乃微願之永畢誓傾
勤瘁以補遭逢

代宰相謝春社日賜御筵狀

右臣今日中使某至中書奉傳聖旨賜臣等御筵者候

靈星而置祠將興農作擇元日而命社爰舉國章和羹
方愧於素食推食遽蒙於飫賜此蓋皇帝陛下率遵時
令寅奉天時道協建中仁深逮下屬陽春之嘉節申宴
樂於近司飛觴俾極於醺酣折俎更均於慈惠歡呼飽
德唯驚鼉腹之屬厭跼蹐畏威但仰龍顏之咫尺共荷
雲天之施益堅金石之誠臣等云云

代宰相謝賜御製社日詩狀

右臣今日中使某至中書奉宣聖旨賜臣等御製社日

詩若干首令依韻和來者命社之辰聿當於春仲變風
之什獲覩於天章方蒙式宴之私忽奉言詩之賜此蓋
皇帝陛下思探繫表道合帝先宣雅曲於南薰阜財解
愠總乾文於東壁懸象著明屬品物之載陽矧穆清之
多暇爰紆睿思成是永歌居然治世之音至矣聖人之
作雲漢但光於凡目已歛曷繼於正聲徒忘味於齊庭
更驚魂於葉縣諒嗟嘆之不足實慶幸以同深臣等云
云

代司空相公寒食日謝賜御筵狀

右臣今日中使至奉宣聖旨就臣私第賜御筵者荆楚
歲時早傳於令節太原風俗爰舉於舊章方休澣於私
門忽頒宣於公宴此蓋皇帝陛下嘉天時之大順念春
物之載陽適因禁火之辰特示需雲之澤供帳既光於
顏巷分甘仍出於堯樽華門迴長者之車鼙腹飫大官
之膳樂以侑食固肉味之都忘酒乃合歡且羽觴之無
算感德唯期於醉飽省躬更誓於糜捐

代司空相公乞免賻贈狀

右臣今日中使某至私第奉宣聖旨以臣第幾男某天
殤特賜某物者晉相萬錢方致懸貺之誚童烏九歲俄
纏舐犢之悲年未及於成人禍良由於瞰室敢謂恩加
贈祿禮越彝倫況下殤之服紀素輕而宰司之俸入殊
厚聖周之費固不至於慮居賻布之儀乃深為於躡等
雖天慈之所及實公議以是憂豈惟增謗於素殮更慮
害盈於陰騭伏望皇帝陛下俯矜忝冒曲示保全察茲

跼地之誠恕以扣閣之僭特令停寢用息怔忡干犯宸
嚴期於得請云云

代宰相謝賜新印道德經狀

右臣等昨日伏蒙聖慈各賜臣等新印道德經并釋文
各一部者伯陽立言首天地而稱四大馬遷約史先黃
老而後六經是開衆妙之門足助無為之化恭惟皇帝
陛下功侔亭育德合希夷清明在躬蓋凝神於姑射慈
儉為寶爰躋俗於華胥稽古訓以惟精訪遺編而大備

乃復欽崇妙道紬繹微言以為柱下史之書允為教父
河上公之注未洞玄關式因唐室之討論早在虞庠而
流布歲時寢遠頗多魚魯之譌方策惟新蓋出絲綸之
旨已成功於刊刻忽命使以頒宣臣等徒慶逢時俱慙
昧道心希漢相但清淨以為師學謝蜀嚴豈指歸之能
測唯荷記憐之造彌堅報効之誠

進洞霄宮碑狀

右臣昨奉勅令臣撰亳州洞霄宮碑文進呈者聞命魂

驚抽毫思軋殫罄驚拙綿歷旬時竊以玄元誕育之區
光靈未泯睿哲欽崇之旨修奉惟寅爰畢堅塗將刊琬
琰合咨大手用志新宮而臣猥奉僉諧獲當撰述之色
絲之妙曷示方來參衡石之餘空塵聖覽內循鄙陋尤
負醜慙其碑銘今已撰成謹隨狀上進干冒宸嚴

陳乞奏狀

不曾上

右臣竊以穹旻覆物所貴於聽卑臣子事君固許其無
隱敢傾肺腑上黷冕旒伏念臣本出單平素非茂族先

皇憐其好學實在清華陛下採以虛名驟加甄擢預諫
諍七人之列掌絲綸五色之言身紆三品之服章日奉
九重之朝謁實為儒之健羨誠受恩之寢深敢不策勵
疲駑服勤官次終虧稱職之譽空累知臣之明每循省
以若驚在報効而無所豈合更傾私懇上浼公朝蓋以
臣世異膏梁跡本羈旅負郭素無於別業北堂方侍於
慈顏自委質効官代耕得祿基功相聚莫匪至親衣食
所資悉皆仰給雖職司之甚重在俸入以極微至於吉

凶慶吊之資僕馬薪芻之費凡百用度皆出其中諒饘粥糊口之不充豈甘旨養親之能及早者以迫於旅火曾扣帝閭述屢空之可憂冀倒懸之或解而義輪晃朗未照於覆盆河鮒焦熬愈悲於涸轍蓋念處掖垣清切之地受帝王特達之知出入於金門玉堂陟降於赤墀文陛苟尺帛斗粟稍有資儲夕膳晨羞不虧奉養且無求於豐泰况粗守於廉隅又豈願以區區之誠上煩君父籍籍之口騰誚搢紳既擠壑之是虞亦觸鱗而無避

伏望皇帝陛下道存惻隱仁極表微憫其聚族於京師
只請本官之俸料或館閣之內俾兼著撰之職司或旬服
之間特授藩方之優寄庶稍沾於加給聊有救於固窮
其於燕谷迴春西江激水頓蘇暖律驟躍洪濶並出殊
私非敢有望云云

代駙馬王都尉乞書史狀

右臣輒寫愚誠上塵聖聽退循踰僭甘俟誅夷竊念臣
門襲素風家承緒業服膺為學爰自於青衿刻志窮經

誓通於絳帙本冀千名場屋濟美箕裘遽席寵於沁園
更冒榮於環衛影纓就列敢矜戴鵩之雄挾策讀書尚
負亡羊之愧臣伏見國子學印本九經書并釋文史記
前後漢書三國志等蓋聖人之垂教或良史之立言咸
經校讎早備刊刻臣面墻有素閱市無聞徒堅學古之
心欲望賜書之寵上件書等伏乞聖慈各賜一本所冀
韋編屢絕獲探典籍之言木鐸載揚無辱文明之化臣
之鄙願實在於斯

代僕射李相公謝歲節賜御筵狀

右臣今日中使至臣私第奉宣聖旨賜御筵者端月標
辰方畢稱觴之禮需雲式宴俄推折俎之私分甘蓋自
於大庖供帳更榮於陋巷此蓋皇帝陛下嘉元正之首
祚屬開泰之膺期念休澣之文著乎甲令欲慈惠之澤
及彼近司爰就敝廬俾為盛集金絲合奏穀核具陳腹
滿社鼉共負屬厭之媿心傾園藿曷酬臨照之恩

代人轉對論太學狀

右臣位忝朝行次當輪對合陳愚瞽上黷宸嚴退省僭踰彌增戰慄竊以教化之本學校為先故國家開設膠庠敦崇儒術立成均博士之職遵祭菜鼓篋之規大集生徒俾加講習所以扶翼至教激揚素風然臣竊見博士之各專一經員闕而未備國子之並設六學職廢而不修臣又見唐太宗貞觀中增築學舍至千二百間國學太學四門及書算律學生凡三千二百六十員及至軍衛亦給博士授以經業乃至三韓吐蕃高昌諸蕃國

並遣子弟請入國學增至八千餘人文德之盛超絕前
古今朝廷安靜聲名震灼而太學制度尚或未備況三
代之制王公已下子弟之秀者爰自總角即肄國庠仕
進不由於他途講學必行於考校故每歲兩館生冠郡
國之首齒胄之典興化是資今學舍雖存殊為湫隘生
徒至寡僅至陵夷貢部以鄉舉為先諸生以兩館為耻
塞源拔本莫甚於茲臣欲乞精選五經博士咸備其員
大啓國庠增設學舍少給廚廩賜以本錢然後明勅公

卿大夫凡子弟纔及升髦即皆隸籍夏弦春誦咸舉舊
章小成大成率如前典貢部取士必以兩館居先周行
歷官皆由博士為重然後並修諸學式協前規使禮讓
興行風俗淳厚追蹤三五坐致太平端拱無為翹足可
俟

代中書請聽政狀

右臣等伏以先后升遐宸衷哀慕痛深創鉅擗標傷摧
殆茲彌旬覺然在疚雖三日聽政備遺誥之丁寧四表

叫闥罄羣情之懇到而詔旨敦諭形於未忍朝野惶駭
罔知所圖竊以機務至繁不可以暫曠治命至重不可
以輒違況自先后聖體弗康載離寒暑皇帝陛下衣不
解帶藥必先嘗躬禱神祇徧走羣望親候安否日至寢
門或常膳之載加然乃御食雖中夕而屢起靡敢寧居
動靜承顏勤勞不匱天子之孝載籍所無及茲上僊追
懷罔極充窮永感諒闕不言臣等獲造倚廬面陳至懇
願以宗社為念少抑哀懷望遵顧命之文俯臨庶政而

易月之制聖情誓守於几筵宅憂已來天顏殆至於樂
棘臣等兢惶屏息不敢仰視伏望陛下循祖宗之舊典
克保彝章稟母后之遺言勿違慈旨節哀順變式協前
經垂拱嚮明躬決庶務以天下而為大計俾羣臣而覩
清光如此即長樂如在之靈實歆孝德有司各揚之職
不系官常所繫非輕期於得請

代王寺丞為弟乞應舉狀

右臣輒寫私誠仰干聖聽退量僭越甘俟誅夷伏念臣

門襲素風家承緒業自先臣之淪逝乃賤族以替凌臣之二兄並叅朝列俯鄰一紀俱揜泉扃唯臣與弟鄉貢進士貽序勉紹箕裘恐隳堂構永懷陟岵但深罔極之哀相顧在原同勵自強之志微臣幸緣世胄獲踐官常臣弟刻苦藝文服勤簡素誓求一第用慰九原咸平四年冬叨京府之薦能預澤宮之試藝雖從退黜靡敢怨尤益堅學古之心庶遂起家之望今歲已頒詔旨大啓貢闈南郭吹竽豈容濫廁東堂折桂咸激壯圖而臣私

室挺災長主薨背方纏哀於戚里難旅進於名場然而
情迫由衷理須犯上蓋以臣弟齒髮已踰於壯室姓名
尚在於白丁以舊相之遺孤與編氓而等列辛勤硯席
殆過於十年嗣續衣纓未沾於一命况稀逢於鄉舉憂
漸墜於門風伏望尊號皇帝陛下念微臣闕閼之微哀
憫臣弟身名之蹭蹬不令公輔之後夷於平民俾預賢
能之書升于天府苟得齒四方之貢士蒙再試於春官
妍蚩雖卜於至公存歿實銜於大造

代許州李相公陳乞狀

右臣伏有懇私須干聖聽退循僭易甘俟誅夷蓋念臣
兩日前獲奉宸遊親陪宴射侍天顏於咫尺廁鼎席之
崇高在鎬飛觴但驚於無算飲河滿腹自媿於不任而
重瞳曲賜於撫存方寸彌增於感激適對顒顒之當宁
頗成喋喋之多辭雖覆燾之見容亦誼譁之是懼且念
臣斗筭之器素狹犬馬之齒已高霜玉笋之餘既難勝
於天獎接公槐之列徒負愧於朝倫況今享勞有期將

均於慈惠台衡之任實冠於搢紳或舉白之如初必裁
冠而致誚空自成於貳過益有玷於具瞻伏望皇帝陛
下曲賜保全深垂矜察俾不令於引滿庶免至於失儀
顧瀝懇以由衷亦懷憂而失據仰希慈造特允下誠

代中書乞免和御詩狀

右臣今日中使至伏蒙聖慈賜臣等御製契丹出塞將
議迴鑾五言六韻詩一首令和來者萬乘時巡六羸宵
遁款塞願修於舊好息民姑務於遠圖烽塵已靜於龍

荒鑾輅將旋於象闕式啓和戎之利佇臻偃伯之期皇
帝陛下深念生民靡辭於櫛沐聿修神武期息於干戈
念驕子之乞盟俾行人而荅聘果通歡於異域將旋軫
於上都爰形風雅之言用導憂勤之旨頌聲載洽克彰
正始之音玄象式瞻但賁昭回之彩臣等繆塵台席獲
奉宸篇已欣凡目之榮觀更俾庸音而繼和竊循情學
空効冥搜雖強綴蟲文豈有成章之美而共慙鳬脰虔
祈護短之仁敢望恩憐曲垂矜免

兩制謝賜御詩狀

右臣今日入內侍高班趙誠信至奉傳聖旨賜臣等
契丹出境將議迴鑾五言六韻詩一首令依韻和來者
天驕犯塞鑾輅時巡繼好息民式啓和戎之利迴轅返
旆將聞振旅之期慰生民僕后之心叶載籍止戈之義
皇帝陛下躬親櫛沐蒙犯風霜巡細柳之營貔貅賈勇
賦大風之什雲漢垂文克宣治世之音實顯聖人之作
臣等謬忝司言之任慙無護蹕之勞辱示宸章俾窺睿

藻壁月珠星之彩既獲於仰瞻陽春白雪之篇仍容於屬和拭目之榮雖積燥吻之慮彌深徒共挾於荒蕪誠預慙於鄙淺感懼之至無從臣等云云

代集賢寇相公謝就宅賜宴狀

右臣今日中使至奉宣聖旨就臣私第賜御筵者清蹕班旋方洽弭兵之化私門休澣適欽逮下之仁如綸忽奉於宣傳折俎特頒於宴飲此蓋皇帝陛下道侔洪覆澤被含生以百姓而為心御六龍而展義爰及迴鑾之

慶將臻偃伯之期俯念從臣曲頌勞酒王人供帳御膳
分甘荷推食之恩但共懷於慈惠顧飲河之量實同媿
於屬厭仰戴高明豈任隕越云云

代叅政王侍郎陳乞狀

右臣偶嬰微疹特簡皇慈降中使以撫存命大醫而診
視內慙鄙陋無補休明榮衛愆和自寡攝生之要穆清
軫慮曲迴乃眷之仁仰荷照臨彌增隕越况昊穹洪覆
過私一介之軀而藥石蠲痼顯著十全之効只於晷刻

便冀痊平然臣竊有懇誠難從緘默實不遑於肺腑須
上瀆於冕旒蓋以臣自拙將調致茲疾瘳然朝謁之無
廢亦飲食之靡妨風毒所成已積日彌年而如此平復
如故諒匪朝伊夕以難期今者天獎殊常聖恩優厚每
遣近臣而臨問特輟中尚以療治顧腠理之甚微煩星
輶而屢駕勞君親之軫惻在啓處以怔忡其所差到內
使醫人欲乞不令逐日看候或有求取之藥餌俾令修
合以供須亦漸冀於蠲除庶不成於沈痼苟俞所請實

戴殊私

代宰相春社日賜御筵狀

右臣今日中使至奉宣聖旨就中書賜御筵者吉日惟
戊克遵命社之文退食自公忽挹當衢之味此蓋皇帝
陛下念方隅之底定嘉品物之載陽屬勾龍之祀典唯
寅且田畯之農祥始正條風啓序膏雨應期玄貺薦臻
豐年可冀爰順發生之候特均慈惠之私式霈湛恩俾
為盛集酌金罍而引滿同懷既醉之心享玉饌以屬厭

更負素餐之愧仰被涵濡之澤彌堅報効之誠臣等云云

南郊奏舅狀

右臣輒有懇私上煩君父蓋屬嚴禋之慶仰祈錫類之仁既內迫於肺肝固難逃於鼎鑊臣有親舅張僅年四十歲是臣母親弟素通書記兼習刑名緣藝業不至於專門且齒髮已登於強仕進難干於場屋歸仍乏於田園臣外祖頃仕偽邦累宰劇邑所得俸入盡買圖書頗

彰清白之名蔑有膏腴之產下世纔離於寒暑尺椽莫
庇於子孫故臣舅自來只在臣處均衣共食歷歲踰年
臣去冬幸因載誕之辰曾瀝由衷之懇屬以釐革外姓
莫遂私心今者玉帛祀天雷雨作解兌澤咸均於動植
皇明俯燭於幽微臣是敢重寫微誠再祈玄造伏望皇
帝陛下矜其悃悞恕以僭踰憫臣爰自孩提臣母已嗟
孀獨自幼齡而鞠育微臣曷報於劬勞顧外族之替凌
臣母每多於傷感敢冀陛下念臣之遭逢有素察臣舅

之躋登無圖特霈異恩獲霑卑秩俾臣於晨昏就養有
慰於慈親即臣非土木無知終報於明主跼蹐俟命啓
處不遑

納南郊所加恩命乞迴授親舅狀

右臣輒披肺腑上千君親蓋緣危迫之誠難避誅夷之
典臣有親舅張僅年四十歲是臣母親弟外祖頃在江
左嘗事偽邦宰邑字人周旋數任頗著循良之政見譽
當時誓敦清白之規以遺後嗣凡得俸入盡買圖書並

無田園可庇親族下臣纔踰於期歲臣舅已歎於流離
微臣自忝官榮臣舅遂相依倚均衣共食歷歲踰年雖
逢下武之期且乏專門之藝昭代無從而進取流光漸
歎於蹉跎前年因祝壽之休辰適推恩於近列臣曾陳
章奏仰扣高明雖迫切於私心方釐革於外姓去歲嚴
禋云畢慶澤遂行臣亦首露血誠上塵天聽庶於臣舅
獲被鴻私二年並竭於丹衷一命未諧於始願竊以人
倫情義唯外族而最優母黨姻親於舅氏而為重況臣

爰當稚齒臣母已是寡居撫養之仁劬勞備至顧外門
之哀謝且臣舅之羈孤痛傷之懷晨昏在念臣是敢更
冒萬死再瀆九重欲乞納臣昨者南郊所加朝散大夫
及爵邑戶封與臣舅換一卑秩冀霑寵渥用慰慈顏伏
望皇帝陛下念臣幸以蠢愚特蒙甄獎獲預代言之任
別無出位之思蓋迫庭闈之情須犯冕旒之聽兼臣有
親弟三人並已長成凡再遇於覃恩未敢干於當宁實
緣臣舅單子無依敢冀俯察由衷特迴殊造許令臣陳

納所加恩命迴示臣舅一卑品末僚自葉流根儻荷渥
濡之澤摩頂至踵誓堅報効之誠

承天節奏親弟化狀

右臣任忝司言節逢誕聖屬推恩之云始輒瀝懇以上
陳內省僭踰實甘誅殛臣有親弟化與臣爰從幼稚即
歎羈孤共出寒微親加訓勗頗服勤於素業亦俯近於
壯年適鍾下武之期竊有起家之望以臣獲掌書命忝
備掖垣屬虹渚之降祥庶鵠原而微寵伏望皇帝陛下

察以由秉之懇憫茲同氣之親雲天特霈於異恩州縣
俾參於微秩冀獲代耕之祿用為舉族之榮在於辱庸
敢忘報効

武夷新集卷十七

欽定四庫全書薈要卷一萬四千一百七十三

集部

武夷新集卷十八

宋 楊億 撰

表狀 十九首

再乞外任狀

右臣近者瀝懇拜章祈天俟命願諧典郡庶獲養親逮
今旬月之間未奉允俞之旨內懷危切實不遑寧須再
述于愚衷期必迴于聖聽伏念臣早緣薄技謬玷近班
迎侍安輿聚居帝里既代耕而有祿固盡室以相依棲

輦轂以食貧已六遷于歲律厠掖垣而承乏又五及于
王春桂玉是憂旨甘多闕矧又久叨塵于清列莫演暢
于皇猷以愚直之姿素昧毀方之理在孤單之跡常懷
履薄之危皇帝陛下曲示含容特加保庇且令備位未
忍黜幽臣固非土木之無知豈忘君親之大造雖然覆
載之量姑務于包荒其如方策之言亦旌乎知退苟上
煩于澄汰亦何表于廉隅況今外公議以是慙內私誠
而尤迫臣母久違故土深念於鄉閭臣弟寄食妻家莫

均于饘粥臣亦叨榮累歲無補休明聚族神州久嗟僑
寓朝廷就列上惕于官歲晨夕問安中煎于旅火伏值
陛下道光孝治恩厚曲成望推錫類之仁俯察由衷之
懇于江浙之封部擇僻小之方州假以使符遂其私便
慰臣母懷歸之念免臣弟漂泊之嗟有職田祿粟之資
備夕膳晨羞之費臣敢不盡心為治竭力從公分肝食
之憂勤宣寬大之條詔期于盡瘁少報萬分

承天節奏親弟悚狀

右臣職司視草慙無東里之才節值流虹方罄南山之
祝輒祈恩于宸極冀延賞于私門內省僭踰啓處無措
伏念臣有親弟習進士俅爰從幼稚即歎羈孤訓靡及
于過庭貧不遑于學稼自微臣之食祿奉慈母以供甘
提挈以至于上都鞠養殆踰于冠歲辛勤弦誦粗知學
古之方似續衣纓竊有起家之望今者慶逢鳴社澤被
周行不勝同氣之情須黷至尊之聽伏望皇帝陛下俯
察在原之懇稍覃作解之仁推一命之恩俾霑榮于黃

綬齒四民之列免負媿于白衣深慈既被于天倫薄質
惟堅于臣節祈天俟命顒跂允俞

代集賢寇相公謝賜晉書狀

右臣今日中使至奉宣聖旨賜臣印本晉書一部計六
十九冊者兩晉遺編具列祕書之目九重稽古新成鏤
板之功夫何寡聞仰膺蕃錫伏惟皇帝陛下續戎御極
執契臨人負將聖之多能尚觀文而闡化以史筆之所
記有龜鑒以具存魯魚特命于校讎方牘更加于摹印

俾前言之不墜亦副本之廣傳臣謬預持衡實慙昧道
輒上千于宸扆果垂錫于策書學古無功固已嗟于扞
格傳家知幸但永誓于緘藏恭承臨照之私益勵傾輸
之節

代中書賀宣示合穗麥狀

右臣今日伏蒙聖慈宣示奉先禪院後面麥地内生出合
穗麥者上玄降祐多稼呈祥克彰純嘏之休式契豐穰
之兆臣等竊以載籍所重實在于民天瑞典攸徵莫先

于年穀矧惟首種之利最為艱食之資歷三時而有成已
彰大順秀兩岐而發詠允叶元符伏惟皇帝陛下慈儉
居尊憂勤御下先天發令運神化于無方盱日視朝體
健行之不息引萬方而在已以百姓而為心故得洪覆
眷懷殊祥薦委和陰陽之玉燭靡愆離畢之占盼原隰
之龍鱗式覩如雲之稼而况景風適至宿麥將登更彰
合穗之奇用薦有年之瑞升歌九室足播于樂章記事
三長永光于史筆臣等叨居輔弼無補聰明幸矚休禎

徒深慶抃

謝宣召赴龍圖閣宴會及觀御製御書狀

右臣今月某日伏蒙聖慈召赴龍圖閣觀太宗之御製
御書及聖製碑贊并四庫圖書仍賜御詩兼預宴會者
上帝藏書肇開冊府聖人有作爰勒金碑許拭目以榮
觀實捫心而知幸伏惟皇帝陛下順考古道啓迪人文
執左契以御庶邦運大鈞而播羣品車書無外咸歸輿
地之圖弓矢載橐式開仁壽之域而乃講求前訓潤色

大猷擬石渠天祿之舊規聿新層構搜汲冢羽陵之墜
簡並集羣言敦奉先思孝之心顯繼志守文之盛恭以
先朝之述作為後世之楷模萃手澤于縑緗窮筆精于
翰墨秘宸編于延閣用垂示于方來奮睿藻於貞珉式
扇揚于盛美金石頌德實曠古之無階雲漢成章亦羣
生之共覩眷惟近列首獲仰瞻側管窺天寧測蓋高之
量聞韶忘味徒萌竊抃之心矧又賜玉笋之醇醪示柏
梁之絕唱飲河之腹既嘆于屬厭下里之音靡容於絨

默並陳巴拙上黷皇明雖蒙善下之仁終抱黷尊之媿
內循孱薄曲荷恩私閱東序之圖書奉文思而知幸陪
西清之宴豫沐慈惠以難勝唯共誓于糜捐庶少酬于
臨照云云

謝批荅狀

右臣近者恭陪鑄飲仰覲乾文實揣己以知榮輒拜章
而叙感猥蒙批荅備極恩私捧讀周旋慶抃交集伏惟
皇帝陛下道高列辟功濟中區體神武以懷柔法天明

而覆燾撫羣生之重畜朽索居懷考歷代之元龜青編
在御肇新宏構總萃前言先朝之奮藻摘華並藏麟閣
聖主之披文相質高揭龜趺因萬務之餘閒召諸臣而
宴喜金簡玉字既容下士之竊窺白雪陽春更許巴人
而屬和仰奉觀文之德薦承飫賜之仁共慶遭逢徒深
踊躍爰陳奏牘虔述寸誠敢謂陛下濬發睿謨俯頒優
詔曲形敦諭倍極恩慈演絲為綸聞聖言而知感摩頂
至踵勵臣節以彌堅誓畢微生少酬玄造臣無任云云

代中書謝賜聖製乾坤寶典序狀

右臣今日中使至伏蒙聖慈賜臣等御製乾坤寶典序
各一本者星使俯臨宸章下賜莫窺玄遠徒極歡呼竊
以頒歷授時前王之令典觀文察變大易之格言故璇
璣齊政於有虞銅渾設象于東漢珠連璧合定疏密於
諸家夏造商因分指歸於三統是以陰陽之學著於九
流義和之官列于百執歷代而下何莫由茲然而象緯
之文頗多脫簡星歷之史罕或研精金匱石室之中既

紛綸而無紀宣夜渾天之術亦涉獵以非工允屬欽明

疇咨古訓聿修茂典光集大猷伏惟皇帝陛下道邁帝

先智周物表自天攸縱將聖多能執古御今視八方于

指掌窮神知變韜萬化于襟靈而乃懼司歷之失官慮

疇人之廢業盡搜亡逸太補闕遺分別部居刊正譌謬

與乾坤而脗合肇建嘉名法雲漢以成章更紆睿藻誕

揚能事式冠首篇臣等數日前被召穆清獲親冊府幸

覩聖人之述作實為後世之楷模輒祈副本以頒宜庶

遂洗心而披繹敢謂俯從人欲曲允下情卿雲發祥已
竊窺于凡目玉牒不祕更傳寶于私門內惟懜昧之姿
得味淵冲之旨瞻天莫測遊聖無階仰法穹旻見勛華
之稽古奉傳簡策有南董之當官伏望宣付史臣播于
直筆豈獨臣等幸甚實亦天下幸甚

謝賜批荅狀

右臣近者恭承天獎獲覩聖文共拜封章上塵睿覽猥
承批荅曲諭宸襟捧讀再三兢榮失措伏惟皇帝陛下

文思撫運動儉化人錫純嘏于昊穹散皇明于普率撫
柔諸夏煦嫗羣生一戎而不復用兵三變而遂至於道
然而探玄物表索隱天倪衡石自程雅得觀書之趣崆
峒順拜未忘好問之心蹟萬象于毫釐括九流于指掌
眷惟律厯垂示吉凶慮南正之失官或疇人之離次博
求隆簡採撫羣言定黃鍾累黍之差正晉承渡河之謬
聿新制作傳信方來仍枉神毫序其能事兩曜合璧察
時變以無疑五色成文覩天章而在上夫何懵昧並預

頒宣聽廣樂於彤庭彌增惝恍得玄珠于赤水但冀緘
藏輒希付于石渠庶永傳于汗簡恭承明詔深諭至懷
靡徇下情曲形睿旨仰乾坤之德謙無得而名諒河洛
之祕文有時而出在聖神之垂範豈愚瞽之能知唯荷
戴于鴻私永鐫銘于丹腑云云

謝中使傳宣撫問狀

右臣昨日中使至臣安下處奉傳聖旨以臣所患時加
撫問者王人薦降天語載臨側聞綸綍之言頓愈膏肓

之疹省循備至感懼交并伏念臣本自諸生獲逢休運
非丘園耿介之秀無公卿籍甚之名弄翰為文不過篆
刻濯纓筮仕最處羈孤皇帝陛下過聽庸虛薦加寵擢
俾升禁掖式掌訓詞居清切之司冒榮斯甚草寬大之
詔稱職無聞積日彌多妨賢為愧今者攝生寡要遘疾
自貽度越旬時曠廢官守嘗趨期會幾陪于軒墀再奉
德音特頒于假告式加調理漸冀痊平敢謂濬發宸慈
特矜賤跡九霄之上命星使以俯臨四壁之中迴天光

而下燭荷記憐之殊造感存卹之深仁寸心但誓于捐
軀危涕不知其濡睫勿藥斯喜幸漳浦之有瘳戴天彌
高覺泰山之非重顧餘生之未泯必盡瘁以為期

代中書乞免和御製南郊詩狀

右臣今日中使至伏蒙聖慈賜臣等御製南郊七言六
韻詩一首令依韻和來者因長日以陳儀方修祔祀體
大風而發唱爰著雅章俄賜及于近司實光生于凡目
伏惟皇帝陛下先天合德下武膺期以明察而事二儀

用慈儉而撫諸夏外薄四海罔不懷柔日覽萬幾未嘗
暇逸致羣生之茂遂果玄德之升聞乾符坤珍薦臻于
純嘏雁山雞塞永息于祆氛遺黎得覩于承平率土方
躋於仁壽百姓莫知於帝力一人思報於天功乃因周
正之辰恭修漢時之祭弁冕端委率禮彌恭珪幣牲牢
無文咸秩故得三日先甲密雪清塵六師纂嚴光風拂
衽盼蠻昭荅福祿來同克符永錫之祥用洽無疆之祉
而陛下恭膺景貺濬發睿文窮六義之淵微導三神之

眷祐聖人有作幸獲於仰瞻下里何知更令於屬和共
循荒陋但極憂兢雖効冥搜終成累句陽烏委照爝火
豈敢以呈輝軒鑑高懸嫫母或期於掩惡必希矜免庶
息怔忡

代中書謝寒食賜御筵狀

右臣今日中使至奉傳聖旨就臣私第賜御筵者火禁
肇修方遵於時令宴私云洽曲被於天慈衡門供帳以
生光鼎食素飡而是懼此蓋皇帝陛下嚮明求理逮下

均恩爰當出沐之辰曲需分甘之惠大官先置曷勝推
食之仁小人屬厭但極飲河之量荷照臨之所及實循
省以增榮

謝駕幸編修所狀

右臣昨日伏蒙聖駕臨幸編修所者竹簡汗青方勤於
官次金輿旋軫俄燭於天光表宸極之眷懷聳士林之
觀聽臣等竊尋往諫載考舊聞稱制石渠甘露遂成於
故事修書仙殿開元肇錫於嘉名為儒墨之殊榮乃帝

皇之巨美恭惟皇帝陛下端居清宴博考前言日昃勞
謙疇咨好問賁帛旁求於髦彥榮河上薦於圖書乙夜
觀文每自程於衡石秋風發詠實光被於莞弦而乃允
迪濬謀聿修祕典發凡變例同宣聖之授經欽明文思
見陶唐之稽古臣等並慙禱昧虔稟指蹤抱慙懷鈐服
勤於夙夜持螽側管窺測于高深挾小智於胸襟冀成
書於旦暮敢謂陛下特迂羽葆垂顧鴻都親閱縑緡深
形問訊數刻尚迴於玄覽羣臣徒仰於清光慙無善對

之才莫奉好文之德矧又臨軒前席並示於延登厥篚兼金更均於寵錫荷綸恩之渥縟增藝圃之光輝敢不內省庸虛共思罄竭拜君之錫彌懷虛授之慙為儒之榮曷報非常之遇

次對狀

右臣職忝掖垣次當言事合伸鄙見上浼宸聰臣竊以求材審官方今之急務振淹擢雋稽古之令猷故擇善而稱選衆而舉者三代之彝章下詔郡國懸科有司者

兩漢之茂典不仁斯遠得士乃昌垂於策書誕彰格訓
恭惟國家承五代之季開萬世之基三葉重光九疇式
叙至於並建衆職無曠庶官搜揚仄微登進茂異崇澤
宮之選復試可於廣庭設制科之目親延見於便坐時
下尺一俾公卿而論薦申命外計分縣道以察廉乃至
植諫鼓以來直言置公車而遵舊典開自薦之路擢不
羈之才萬幾之繁疇咨聽納一介之善拔拭進用蓋於
天下賢士大夫無所負矣然或前代之經制載籍之舊

聞未之申明有所闕漏此亦可惜焉臣竊見今吏部流
內銓凡幕府州縣之職盡得考其殿最引對軒陛黜陟
之命稟於宸旨資品之格循乎定規茲所謂官修其方
事無矯舉者矣而書判之設亦足辯材而國朝已來未
嘗責實逮太平興國之初始定等第優劣申以陟降之
命強學待問之士頗獲於褒陞竊祿無狀之人亦加於
懲艾況今遵守成憲下無間言其於慎重官人澄汰繆
濫畫一之法既盡美矣若乃搜羅羣萃登擢髦俊旁求

之義尚或闕如臣竊見天下吏員幾於數千罷秩去官
出入選調其人固已多矣先儒稱三人有師前王恥一
夫不獲而詵詵濟濟豈無懷材藏用角立穎脫之奇但
恨取之之術有所未盡且唐制吏部有博學宏詞書判
拔萃平判入等三科蓋求之於常調中非為草澤設也
伏望皇帝陛下特詔冊府講求舊章申飭天官奉行故
事刈其翹楚被以寵靈下既無于滯才人亦聳於學古
如此即思皇多士近比周成之隆允釐百工遠追有虞

之盛干犯宸扆伏俟採收臣無任云云

封駁銓司主事王太沖狀

門下封駁司右今月三日中書發過劄子流內銓主事
前撫州宜黃縣主簿王太沖特授大理評事依前充流
內銓主事者竊以朝廷稽方策之文修班爵之制所以
辨品流之清濁峻堂陛之等威克敦稽古之風俾絕濫
官之謗盖有國之令典致治之大猷也謹按六典大理
評事十二人掌出使推案凡本寺斷獄皆連署焉自唐

室已來並預三司之案鞫而近年之制或貼三館之職
名苟非士流不齒茲選況秩叅卿寺官有常員竊尋歷
代之規罕兼流外之任忽頒新命恐紊彝章儻以王太
沖經術登科無嫌於除授在於銓衡祇役固合於解停
庶官守之有倫實國體之可惜臣等忝司封駁合具上
言伏望宸慈特迂聖斷

代中書請依詔頒行畫龍祈雨法狀

臣等伏以先天合德易象攸稱勤雨憂民策書所紀恭

惟皇帝陛下光膺駿命奄宅中區視百姓以如傷慮三
時之有害博訪弭災之術期臻阜俗之方或稍屬於亢
陽即徧走於羣祀恭修禳禳薦獲感通觸石興雲俄千
里而雨集力田望歲果百穀以秋成信雩禜之有徵由
穹玄之降祐式頒明詔誕告庶邦永消憊伏之虞同躋
仁壽之域臣等叨居輔弼仰奉憂勤變調之効無聞將
順之誠彌切願奉宣於睿旨庶大庇於羣黎伏請付有
司雕印頒行天下

代中書謝秋社日賜御筵狀

右臣今日中使至奉傳聖旨以社節特就中書賜御筵者西成屆候幸當命社之辰北闕宣恩式霈霈雲之象示宴私於著位布慈惠於當陽此蓋皇帝陛下嘉品物之豐登因令文之休澣堯厨推食穆醴分甘有司供帳以載嚴近侍影纓而咸集既飽以德但媿於屬厭退省其私更慚於尸素荷照臨之所及諒報効以何階

進夔王周王誌文狀

右臣先奉勅撰故夔王周王誌文者竊以奉大君之明
詔紀賢王之令猷爰刻貞珉以誌幽壤自非鴻筆曷振
清芬如臣者謬典王言久塵官次發揮寡譽戶曠懷慙
豈謂宸慈更令譔述祇膺嚴命伏用兢惶輒已罄竭諛
聞奉揚遺懿屬詞之妙既異於色絲褒德之稱敢同於
華袞徒躑躅以燥吻實忸怩而厚顏蕪穢頗多悚惕茲
甚其志文二首謹繕寫隨狀上進云云

進邠州靈應公廟記狀

右臣奉勅撰邠州靈應公廟記聞奏者恭膺睿旨虔述
靈休無史遷叙事之才乏士衡患多之思怔忡捧詔僊
俛成文叅乙夜之觀空塵聖鑒載職方之志曷示將來
內省空疎不遑啓處其記文謹繕寫隨狀上進云云

代宰相謝賜重陽日瓊林苑宴狀

右臣伏蒙聖慈特就瓊林苑賜宴者無射司辰登高屆
候萬斯箱之慶方屬有年三令節之遊備存故事敢冀
需雲之澤曲推湛露之私此蓋皇帝陛下大德庇民至

仁育物當車書之無外因朝野之多娛謹頒令以授時
爰示慈於式宴矧惟仙苑近在商郊靈沼始波動周雅
躍魚之詠高臺在望揜南朝戲馬之名爰遇嘉辰是陳
良會太官先置極萑莆之珍羞飛蓋相追邁龍山之遊
集矧復霑玉笋之餘瀝泛金菊之繁英紳組相輝笙絲
迭奏聽鈞天之廣樂恍疑夢寐之中預玄圃之勝遊迴
在風塵之外徒感恩而盡醉慚報德以無階

書

荅史館查正言書

某再拜正言學士足下頃者前襄陽張令至辱示手筆
備形慰誨耽翫無斁鄙吝都遣客塵洞分神明來舍涼
若醍醐之灌頂快如曜靈之炙背荷知識之啓迪為昏
愚之歸救幸甚幸甚然障覆重複義趣深遠或所猶豫
固容咨決竊味雅旨有簪組非累身之說蒙有滯焉盖
念無始輪迴積劫孤露偶薰習於種子獲遭值於仁賢
幸於此生得悟本性而前塵外境如芥絲亂繩本覺妙

心殆秋毫野馬舉為牽制動即淪胥先德亦云道力尪
微必處靜而能照宗門所謂悟解超頓須漸修而乃成儻
或以初殖之德牙淪無邊之愛網沈浮陰入之界趨走
聲利之場自以了達苦空脫去事理謂生死而無怖謂
富貴而儻來此適足以長無明支成增上慢若夫現三
十二應化千百億身居士王臣隨方設教猿猴鹿馬與
物利生此須功行圓成福智滿足登地證果乃及於斯
自餘涉川救人未免俱溺哺糟處世何能獨醒載尋善

誘之言盖有造微之旨豈非慮鄙夫尚迷真諦猶戀榮
名便令捨去恐致迷悶然固陋之志亦小異焉儻壽量
頗延緣累自薄當俟夫四五十須背俗息見反本循元
修天台之止觀專曹溪之無念庶於此報必證菩提俟
兜率下生龍華後會為之主伴請轉法輪對越人天親
受佛記雖二乘而弗學豈三界以能安懷懷之心實在
於此足下衆德普會八部歸依暫現宰官之身常修菩
薩之行濟度羣品引翼有情作十園林具四誓願傳受

心印直指不疑演說色空辯才無礙儻矜其可教望惠
之好音所期奉以周旋不敢失墜或理參邪見旨失真
宗未至膏肓可施鍼石亦希提獎無便棄捐幸甚幸甚
秋氣變衰王事鞅掌強食慎疾副茲瞻顙

荅李寺丞書

某再拜昨晚辱示真蹤備形雅旨屬以專介迨於嚴局
率爾奉酬缺然未足及再加紬繹賸其會歸如聆玉音
若抽繭緒酌之不竭鑽之彌堅何詞辯之縱橫文采之

巨麗俊發若此其誰敢當然士君子之立身大丈夫之處世當以道義為勝負豈以位貌為等差故仲尼不過陪臣子雲僅至執戟賈誼止傳於梁園梅福纔尉於南昌皆名震方來道冠天壤寧與夫司馬善宦四至九卿曲逆陰謀啓封萬室條侯倨貴盧杞奸邪享列鼎之榮據三事之位同日而語耶矧君侯富有春秋老於文學承闕閱之後若單平之家生綺紈之中挺布素之行凡所著述必得作者之風至于游從莫非一時之雋心無

城府言成陽秋以孝謹著於閨門以寬厚伏於儕輩臨
事剛決而能斷結交悠久而不忘譬諸椒蘭人所服媚
猶夫桃李下自成蹊實為鄉材居然國器而未引金門
之籍未踐赤墀之塗藏器甚深括囊靡露困於卑位形
於話言愚以為君侯德美既彰富貴何遠亦猶黃琮蒼
璧必以禮天神地祇明月夜光終須置掌握懷袖所宜
居易以俟待價而沽乃為乾坤之珍符皇王之寶玩苟
自躍於冶求為鎮鄒來獻於庭願剖荆璞或未見辨反

謂不祥此交遊之情鄭重之至也君侯明達聰悟專柔
直方修飾廉隅佩服名教三揖而進願保格言一擲成
盧何為得雋更味環中之旨勿貽動者之譏況才識並
優英華外發析珪縹組誠天理之必然霧隱泥蟠蓋時
命之未會耳幸惟曠度見採狂言式懋永圖克保全德
不勝喋喋之至

荅并州王太保書

并州太保麾下近於集賢石君表臣處得手筆一封馳

翫再三不能暫捨文彩煥發五色以相宣理道貫通有
條而不紊薰風拂衽自然析醒簫韶在懸殊覺忘味何
厚賜之所及見久要之不忘甚善甚善竊伏自念江表
布衣材出人下非山東閭閻之後無負郭膏腴之產徒
荷世業遂參儒流齟齬之年傳召詣闕弱冠之歲通籍
於朝擔簦躡屨既周於四方抱慙懷鈇亦幾乎十載何
嘗不咨諏先覺博求同人直諒多聞必取乎三益談窮
勢賄克慎乎五交懍懍然唯懼當世之賢豪見拒而不

容也數年前石氏西齋邂逅相遇盱衡抵掌坐客盡傾
枕麴藉糟羽觴無算亦既卜夜至於繼燭剖心析肝蕩
無城府講道論義芬若椒蘭傾蓋如此故謂之矣未幾
邊郡思又足下既驅十乘而啓行國書成功下走亦一
麾而出守地里遼遠誠馬牛之不及官守縈繫同匏瓜
之見拘無復裁咫尺之書述固陋之懇去年僕祇召西
走來朝帝庭足下方鎮并門式遏戎略引領北望緬懷
故人恨不得解籍金閨從軍紫塞依蓮汎水陪幕府之

賓從投壺雅歌奉郡齋之遊宴今年肇自書殿入陞綸
闈以雕蟲篆刻之才當典謨訓誥之任五穀之稯不能
成虎豹之文一割之刀固無剗犀兕之利方夙夜愧惕
懼忝君命為知己羞而足下聞之欣然以書為貺松茂
柏悅情雖後凋玉振金相詞多溢美且徵縉雲贈行之
什頗有姑尤善祝之言雖然戲謔若合符契竊以古之
交道嘗聞之矣蓋以聞善相告爵祿相先急病讓夷謀
事補闕以引以翼或推或挽故蕭何舉代曹參趨裝以

請行王陽登用貢禹彈冠而願仕伐木求友頌聲載揚
遠方得朋名教為樂益以見足下之意當僕之領郡也
必欲發揮虛名稔熟輿聽故羣公供帳發而成詩及僕
之竊寵也又欲銷弭浮謗充塞前言故千里附書明徵
其事使鄙夫無暴得之媿聖朝免虛授之譏仁者用心
其利博矣足以明殺雞炊黍范張區區於小信縞帶紵
衣僞札拳拳於微物以今況古夫何隘哉邊塵不驚戎
閭自肅干木高卧足以作藩夷甫清談未妨為政唯節

宣吐納順時加愛副九重推轂之寄成萬里封侯之業
斯悽悽之誠所望於明哲也某頓首

荅錢易書

某白辱示戒殺生文披繹數四不能釋手非宿殖德本
深達實相於十方佛種諸善根處五濁世遠離黑業信
力堅固心華發明其孰能形於文詞垂於勸戒如是之
勤切懇至也某不佞竊從事於空宗為日雖淺聞道素
篤常服首楞之典獲佩法王之訓乃知世間輪迴殺貪

為本胎化濕卵強弱相吞生死循環互相啖食始由一念之迷惑遂致萬化之紛綸相變體殊識均形異而乃取其血肉以滋牙齒鬻割炮燔剝剔割斲是使人羊迭變各自報讎火刀殊塗並淪苦趣我佛所以為一事因緣而出世設十二分教以化人誘掖羣迷首舉茲事乃著五戒以殺戒而為先乃標三毒本貪毒之所攝故玉毫光明而顯相金口鄭重以形言深念含靈直指正路以為食肉而証法果實墮邪魔好殺而出塵勞無有是處偕如

智慧自足禪定現前不過為大力鬼神夜叉羅刹一報
既畢衆苦所叢墮無間阿鼻歷僧祇大劫是以比丘結
夏恐踐微蟲菩薩在塗不蹋生草此世尊之清淨明誨
衆生之寃債本源奉之周旋豈可失墜乃至無麤無卵
小正之遺文飲水蔬飯宣尼之素志春秋所記肉食未
能遠謀易象之言殺牛不如禴祭殮必方丈史策罪其
奢豪庭有懸貍詩人譏其尸素咸有明訓載於青編且
夫仁人之用心常善以救物就死地而轂鯨豈忍於牛

羊稟生氣以肖翹必愛乎螻蟻而乃屠於刀机之際充
乎杯俎之間竟水陸之珍羞奉口腹之嗜好至有南朝
牧守所居而飛走輒殫西晉宰衡一日而金錢盈萬蓋
厚於味而薄於行夷吾之劇談嗜欲深而天機淺漆園
之高論豈可忽因果報應之說逐醉飽睡眠之徒何以
為大丈夫何以為法王子故足下因几筵號慕之隙禪
祥吉祭之辰念劬勞之恩終天莫報顧追薦之福惟佛
是依對香火以抒誠託文字以宣意八部龍天而侍衛

一切聖賢以護持奮筆不停移晷而就金聲玉振霞駸
雲披淨名談空蓋助如來而行化摩耶証果爰詣堯率
以往生此又豈與刻木丁蘭瞻形隕泣圍碁阮籍嘔血
自殘但能取於毀傷莫有資於解脫同日而語寧易得
哉且奉示言欲刊方板俾傳布遠邇激勵昏蒙此所謂
分一燈為百千燈發一言而千里應之者也讚歎踴躍
不知所裁聊述所聞用以為謝不宣

荅陳在中書

某白辱所著蒙言釋象六篇披繹之際初不能曉既而
考釋卦之由隲取象之自有條不紊乃端若貫珠自難
而易亦漸如攻木頗以見作者之旨也豈不以山泉之
象著於大易以險而止蓋取諸蒙二象並設所以建六
爻之位六爻肇分所以明一卦之意初六混沌未判目
之為混源九二剛中得位於焉而照物六三有求明之
義六四得養正之理六五陰默上九文明推而廣之區
以別矣且自三五以降訖於周政教之汙隆討禦之得

失創守之方略治亂之本原莫不周旋紬繹包括總統
引而伸之如繭之抽緒提而舉之若網之在綱窮理盡
性鉤深索隱磊磊落落自成一家之言矣昔京房作易
占焦贛作易林歷代宗之然不過卜筮之說子雲述太
玄建立方州部家雖云準易其如參以星歷頗近術數
若今之所作但取一卦之意磅礴數千載之間撫其成
敗是非可為著蔡者著於篇傑然名家貽於後覺蓋與
夫先民之用心不同矣方將獻於公車升聞於天充衡

石之餘備乙夜之覽夏侯勝有云士患經不明經苟明其取朱紫如拾地芥耳君之是舉豈僕所能識哉其本輒留庶用探究聊述所聞豈足多謝

發願文上 舍人 沙門 願安

弟子某甲謹沐首齋心信曰 十方常住一切諸佛真淨妙法無生聖人惟願以真實眼真實智真實平等不捨誓願洞賜哀憐切念某與法界衆生從無始曠大劫來未識佛時未遇法時未曾會僧時於其中闕至於今日

趨塵背覺迷失本心閉解脫門涉輪迴道蝟張見網蜂
喧妄擲懸嗜慾之帆鼓無明之浪杯我慢酒醉若惱鄉
不憑歸向之誠是滯果因之迹如斯過咎齊佛所知唯
佛所見若輕若重等與法界衆生有茲罪者同共懺悔
願罪銷滅願罪銷滅以某甲所集凡有善根
隨時迴向願與法界
衆生迴向真如實際菩提實際衆生及微塵刹海諸佛
土中承諸佛本誓願力大威猛力勝護念力盡未來際
直至無上菩提為一切依正莊嚴具為一切自他解脫

門一切三昧門一切陀羅尼門一切安立衆生門一
稱虛空等法界皆有我身起勇猛心捨身命財興大佛
事作大利益攝化有情願諸有情見我身聞我名皆發
菩提心與我同共迴向無上菩提心不退轉願某與法
界衆生未契心者聞佛知見悟本自心一念發明諸境
純淨去來坐立見覺聞知咸以如實知相應不相違背
從今已去盡未來際憶菩提心令菩提心相續不斷所
作利益常得現前供養諸佛利樂衆生衆生成佛盡然

後成正覺虛空有盡我願無窮法界有邊願心無極盡
入行願海中一時成佛摩訶般若波羅蜜

武夷新集卷十八

謹案卷十七第四頁後四行俾臣兄沾贈典之徽
原本徽訛微今改

第七頁後一行允為教父句疑有訛


第十九頁前一行頗彰清白之名原本頗訛頃
據別本改

卷十八第十三頁後三行角立穎脫之奇刊本奇訛者
據別本改

第十五頁前四行信雱榮之有徵原本榮訛榮

據禮記改





總校官庶吉士臣張能照

校對官編修臣閔惇大

膳錄監生臣陸恩綬